

Թախանձէին զքահանայս և զիշխանաւորս Հայոց, հաւատարիմ և սիրելի եղբայր կոչելով զնոսա, ժողովել զկրօնաւորս և պատսպարել զնոսա 'ի վանս ուրեք յերուսաղէմ: Առ այս խնդիր նամականիք իշխանաւորացն Հայոց գրեալ Թախանձանօք 'ի նմին ժամանակի առ Անդրիաս և Աստուածատուր Պատրիարքունս, լինել խնամակալ Լատին կրօնաւորաց, սրահին տակաւին 'ի Ս. Աթոռս: Իսկ Յոյն պատմիչն առեալ 'ի Լատին ճանապարհորդէ ումեքէ Բակիվիլ կոչեցելոյ, պատմէ այսպէս: Ոմն 'ի պատուաւորացն Հրէից բռնակեալ 'ի Կոստանդինուպօլիս, սեղանաւոր մեծի Վէզիրին և սիրելի յաջս նորա, դէպ եղեւ նմա գնալ յերուսաղէմ՝ յուխտ, ցանկացաւ նաեւ գնալ 'ի վանս Սիոնի՝ ուր էին գերեզմանք Դաւթի և Սողոմոնի նախնեաց իւրոց, և խրնդրեաց 'ի տեսչէ վանաց մտանել 'ի ներքս, բայց նա ոչ եթող 'և անարգութեամբ դարձոյց զնա յետս: Վշտացեալ ընդ այս Հրէին՝ երգուաւ յօրէնս իւր, անպատճառ նիւթել չարիս 'ի գլուխս Լատինաց: Ի դառնալ Հրէին 'ի Կոստանդինուպօլիս՝ եւ 'ի հարցանել Վէզիրին զուղեւորութենէ նորին, ասէ՝ 'ի բազում ցաւոց և 'ի արտմութենէ սրտի իմոյ, չեղեւ կատարեալ ուխտն իմ. զի տեսի զգերեզմանս Դաւթի և Սողոմոնի 'ի ձեռս քրիստոնէից, որք 'ի պատուի են նաեւ յաջս ձեր, և արդելուն զայս 'ի մտանել անդր, և չէ արժան լուել ձեզ զայսմանէ և թողուլ զայնպիսի տեղի 'ի ձեռս նոցա: Իսկ Վէզիրն ունկնդիր լեալ բանից Հրէին, հրաման ետ այլազգեաց հալածել անտի զԼատինս, և նոքա արտաքսեալ զնոսա անտի տիրեցին բովանդակ վանաց Սիոնի: Ապա թուէ զխորանս տաճարին Ս. Յարութեան. 'ի Գիւտ խաչն, մի սեղան Լատինաց, և մի Յունաց, 3 խորան Հայոց, Սեղանն Ղունկիանոսի սեփհական ամենայն քրիստոնէից, հանդերձ բաժանումն՝ Հայոց, Փուշ պսակն Հասկեչաց, նոյնպէս վանքն Հայր Աբրահամու, խորանն Գալթոց յետ կոյս Գերեզմանին: Զդուռն տաճարին բանային այլազգիք որոց տարեկան եկամուտն էր 36,000 արծաթ ընեալ, զի մէն մի ուխտաւոր Լատին հատուցանէր 10 մաճար ոսկիս, Յոյնք 5, և այլք 7, բնակիչք քաղաքին՝ 3: Իսկ ժողովուրդք Պաղեստինոյ էին 'ի մեծի նեղութեան, զի Պէտեւի կոչեալ Արաբք յարձակեալ կողոստէին զքա-